



THE AMERICAN UNIVERSITY IN CAIRO  
الجامعة الأمريكية بالقاهرة



Documenting Egypt's  
21st Century Revolution

## الجامعة في الميدان توثيق ثورة مصر في القرن الواحد و العشرين

Transcript of oral history interview conducted with  
##### on July 28, 2011 for the  
University on the Square: Documenting Egypt's 21<sup>st</sup> Century Revolution project

النص لمقابلة التاريخ الشفهي تمت مع  
##### في يوم 28 يوليو 2011 من خلال  
الجامعة في الميدان: مشروع توثيق ثورة مصر في القرن الواحد والعشرين

[00:00:00]

المحاور:

هذا تاريخ شفهي للجامعة الأمريكية بالقاهرة مع مشروع University on the Square: Documenting Egypt 21<sup>st</sup> Century Revolution [الجامعة في الميدان توثيق ثورة القرن الواحد والعشرين]، اللي معاي اسمه.

المقابل معه:

#####

المحاور:

وأنا اسمي ##### النهاردة 28 يولية 2011 وإحنا قاعدين في الجامعة الأمريكية بالقاهرة التجمع الخامس. ممكن حضرتك تدينا اسمك والعلاقة بينك وبين الجامعة الأمريكية ؟

المقابل معه:

أنا اسمي ##### حسن بشتغل في إدارة maintenance [صيانة] تحت قسم air condition [التكييف] نائب مسئول عن قسم التكييف في الجامعة.

المحاور:

طب ممكن حضرتك تقول لنا إزاي سمعت عن المظاهرات بتاعة 25 يناير؟

المقابل معه:

أنا مسمعتش أنا شفت.

المحاور:

في التلفزيون؟

**المقابل معه:**  
لا في الواقع في ميدان التحرير.

[00:01:00]

**المحاورة**  
أنت كنت موجود في ميدان التحرير.

**المقابل معه:**  
كنت موجود بالصدفة مقولكيش إن أنا كنت نازل أو عامل حسابي ورايح بالصدفة أنا ماشي لقيت لك الدنيا إيه في إيه مظاهرة طب انقلاب مرة واحدة مش مخطط لها فوجئت مرة واحدة إن الدنيا بس أنا نزلت يوم واحد من يوم 25 ليوم 28 بعد كدة منزلتش ثاني.

**المحاورة**  
منزلتش خالص؟

**المقابل معه:**  
منزلتش ثاني ميدان التحرير تماما.

**المحاورة**  
بس أنت نزلت 27 و 28؟

**المقابل معه:**  
27 و 28

**المحاورة:**  
طيب ممكن حضرتك تقول لنا أنت اشتريت إزاي ولا عملت إيه أو شفت إيه في الأيام دول.

**المقابل معه:**  
بصي حضرتك الأيام دي كلها مكنش فيه حاجة منظمة يعني مكنش احنا مكنش في هدف، أو أنت نازل على حاجة معينة تعملها أو في مخطط إنك أنت نازل أنا لاقيت فوجئت بالموضوع فاتصرفت زي أي حد طبيعي مش مخطط إن أنا أتصرف، لاقيت إيه ده أنت موافق لا مش موافق لا عايز الإقالة مكنش الكلام دا كله لكن مفيش حاجة مخططة فتعاملت مع الموقف من منطلق حر بس.

[00:02:03]

**المحاورة:**  
طيب أنت بتقول إن المظاهرات الأيام دول مكنتش منظمة طيب تفكر بعديها أو في الأيام دول لو كانت مش منظمة مين اللي نظمهم؟

**المقابل معه:**  
بصي حضرتك هي متتحطش تحت مسمى مظاهرات دي مش مظاهرات دي تجمعات تجمعات كده ناس مش عارفين هما أصلا مش عارفين هما عايزين إيه لأن مفيهمش head [رئيس] يقول ويخططهم كل واحد عنده مصالح شخصية أنا مش عاجبني ده أنا حاطط ده ممكن نخش عند مع بعض ممكن يكون اتنين واقفين متفقين على

واحد معين بس هو دلوقتي مش عاجبني احنا الاثنين حنتخاق مع بعض ونشد مع بعض عشان الواحد ده مش صح دلوقتي مظاهرة خلصت الثورة قامت دلوقتي دي التوابع بتاعتها كلها جاية عكس مش جاية ودي.

[00:03:00]

**المحاورة:**

طبيب متعرفش أي حد من الشباب اللي كانوا بينظموا المظاهرات؟

**المقابل معه:**

لا.

**المحاورة:**

مفيش أي تواصل بينهم؟

**المقابل معه:**

لا مفيش link [حلقة وصل] بيني ومابين أي حد.

**المحاورة:**

طبيب لما كنت موجود في المظاهرات شفت أي حد من الجامعة الأمريكية موجود هناك دكاترة، تلاميذ؟

**المقابل معه:**

لا مشفتش حد.

**المحاورة:**

أو سمعت أي حد راح؟

**المقابل معه:**

سمعت إن حد راحوا أنا مشفتش حد في اللحظة دي أنت بتبقى مش مركزة بتشوفي مبتشوفيش أنت مركزة مع نفسك حتعملي إيه حتحافظي على نفسك إزاي حتحافظ على اللي جنبك إزاي لكن أنت تقعد تدور مين موجود ومين مش موجود في اللحظة دي no way [مستحيل] إنك تشوف حاجة زي كده إلا بالصدفة لكن أنا بالصدفة مشوفتش حد.

**المحاورة:**

طبيب وأنت كنت موجود في أي نكت أي أغاني حاجة حد قالها علقت في ذاكرتك أي حاجة حلوة كده؟

[00:04:00]

**المقابل معه:**

بصي حضرتك المواقف المفروض اللي زي دي ولا محتاجة نكتة ولا محتاج أروح أغني ولا في دماغي القصة دي كده يبقى أنا دماغي إيه الهدف أني رايح أغني وأغني لمين وأغني ل إيه على الخيبة اللي احنا فيها ولا على مناظر الناس اللي بتموت ولا أغني على اللي يقع جنبي ياخذ له طوبة واللي أختي اللي بتتخطف ولا ولا ، ولا ده وقت الواحد يغني فيه ولا في نكتة إن أنا اعلق عليها إيه النكتة حتريق على مين أضحك على مين whatever [أيا كان] اللي أتريق عليه ده أو اعلق عليه كان في يوم من الأيام رئيس الدولة أو أيا كان كل دول كانوا القادة بتوع البلد حتريق عليه يبقى حتريق على نفسي. الأفضل إن أنا أسكت عشان حفص نفسي أكثر من كده ما كفايانا لكن أتريق ونكتة لا دي صعب واللي يعمل كده دماغه فاضية مع احترامي.

[00:05:00]

#### المحاورة:

طبيب ممكن تقول لنا تفكر إزاي المظاهرات دي أثرت إزاي على المحلات على المستشفى على المشروعات؟

#### المقابل معه:

بصي حضرتك المظاهرات هي عشان مش منظمة ومفهاش حد واعي يعني إيه كلمة مظاهرة فطالعة عشوائي أنت بتطلع واحد فاضي ما وراهوش شغل يعمل إيه يروح نازل واقف في الشارع واقف قدام باب محل جه واحد جاب واحد ثاني جنبه واقف بيتفرج التالت وقف جنبه الرابع وقف فقفلوا للراجل المحل الزبون حيخشوا له إزاي مش هيشغل زقوا بعض فالإزاز وقع بيضطر يعمل إيه يقفل محله أشتغل إزاي في الجو دة وبعدين مين يضمن إن هو وهو شغال محدش يخش عليه يسرقه طب ما ده يآثر علي وعليه مش عارف أجيب احتياجاتي مش عارف أنزل أجيب طلباتي أجيبها منين محلات وسط البلد دي كلها خراب ما كل ده اللي أنتوا بتفكروا وتقولوا عايزين تعملوا ثورة وعايزين الناس ترجع فلوسها عايزين وعايزين طب أنتوا خربتوا على [رنة موبايل] كام واحد طب ما أنتم عملتوا كام واحد عطلتهم اللي أنتم عايزين تعملوا تعديل بردوا تعديل فين ما أنتوا بوظتوا شوفوا كام واحد خربتوا عليه الدنيا وقفوا حاله هي دي الثورة الثورة متبقاش كده،

[00:06:15]

#### المقابل معه:

الثورة كل واحد يعمل اللي أنا أعرفه كل واحد يقعد ويروح شغله اللي يطلب منه يتعمل حقي وحقك أنت بتشتغل ليك مقابل الأجر بتاعك حاتخده تعبت زيادة ليك أوفر تايم تاخذه هو ده اللي أنت تطالب بيه ومع مديرك في منشأتك مش لازم تطالب بيه في الشارع احنا مش بلطجية شارع إيه اللي كل واحد يقف مع إدارته لا أنا طلع لها ميدان التحرير باظ ميدان التحرير ميدان التحرير مش بتاع كده التحرير بتاع الكل لما يكون عندنا حاجة عامة مش حاجة شخصية المشكلة بتاعة الشغل والكلام ده كله حاجة شخصية بينك وبين مديرك لما متوصلش معاه فيه مدير أعلى منه فيه اللي أعلى منه واللي أعلى منه لكن أنت كل واحد مش عاجبه مديره نلم بعض يللا بينا نازلين على ميدان التحرير إيه ده تضيع وقت معرفتش تاخذ حقك من المكان ده حتعرف تاخذ حقك بالسياسة وبالأدب مش كله بقى بالخناق لا أنا عابزة فلوسي دلوقتي وبعدين الفلوس هتيجي هتيجي بس بالصبر لو اشتغلنا كلنا وبقينا إيد واحدة وكل واحد بقى عنده ضمير وكل حاجة خلاص كده فلوسنا حتيجي،

[00:07:15]

#### المقابل معه:

وحتستريح وربنا حيبارك في القليل على الأقل بس اشتغل عشان لو أخذت فلوس ربنا باركلي فيه خلاص مش محتاج كتير مش بكثرها ممكن ربنا يدينا كتير و أنا ما بشتغلش ولا بعمل بيها ومحسش أنا أخذت إيه بس نشتغل وناخد الفلوس اللي معانا وندعي لربنا يبارك فيها خلاص.

#### المحاورة:

طبيب في المظاهرة شفت أي عنف أنت شخصيا شفت أي عنف؟

#### المقابل معه:

بصي حضرتك العنف بيولد عنف أنت بتستقزني أنا هستقزك أنت لو مديت إيدك علي أنا حامد إيدي إذا كان الشرطة ولا الكلام ده والشعب كله كله بيجمع أنا ولا أقول الشرطة بس ولا الشعب بس الإثنين مع بعض ودي الغلطة الإثنين مع بعض أنت بتقوله ده القائد بتاعه يقول اضرب طب ببيضرب مش تفكير بقى لا مفيش تفكير بقى في اللحظة دي بينفذ أوامر بتضر رد الفعل الثاني يضرب لكن طبعا في عنف وعنفي مش عادي.

[00:08:15]

**المحاورة:**

شفت أي تلف في المرافق؟

**المقابل معه:**

كثير ده قبل الثورة [ضحك]

**المحاورة:**

طبيب [ضحك] بس ساعة الشهرين دول في يناير وفبراير طب شفت تلف في المرافق فين في التحرير بالذات؟

**المقابل معه:**

لا لا لا بصي حضرتك في كل حنة كل واحد ساب شغله خلاص كل واحد ساب شغله مع احترامي الزبال ساب زبالته ومشلهاش بتوع الحي مفروض يلفوا مفيش اللي بيكنس مفيش اللي كان بيسقي الزرع مفيش اللي كان بيلف ينصف مفيش الكلام ده الزبال مكنش بيجي كل حاجة باظت المرافق وقفت المياه مكسورة تتكسر ملوش دعوى خلاص الشغل اتعطل كل واحد قالك سايبه بقى شفت أنا بتكلم في نقطة كل واحد يرجع يشوف شغله والرزق على ربنا ويعمل اللي عليه وأكد ربنا حيازيه.

[00:09:06]

**المحاورة:**

طبيب تقتكر إيه أهم اللحظات في يناير وفبراير إيه أهم اللحظات؟

**المقابل معه:**

أهم لحظة تنحي الرئيس دي أهم لحظة.

**المحاورة:**

طبيب فيه إيه حاجة فاجأتك أي مفاجآت في الثورة؟

**المقابل معه:**

من ناحية؟ زي إيه؟

**المحاورة:**

يعني حاجة أنت مش كنت متوقعها؟

**المقابل معه:**

هو اللي مكنتش متوقعها طبعا يعني أن الرئيس يتنحي دي حاجة مش سهلة.

**المحاورة:**

طب أنت كنت متوقع أن حيقى فيه عنف للدرجة دي؟

**المقابل معه:**

لا ليه عشان أنا مشفتش قبل كده ثورة محصلتش قبل كده عندنا أول ماشفت مكنتش متوقع كمية العنف اللي بتحصل عندنا دي وكمية السرقة اللي في البلد مكنش حد متوقعها أساسا يعني المبالغ اللي بتتقال دي هل دي حقيقة ولا مش

حقيقة ده كذب ولا تأليف كل واحد قاعد مع نفسه بيرمي أرقام طب وهل دول بس اللي كانوا بس مسيطرين على البلد وكانوا واخدين خير البلد بمعنى أنتوا دلوقتي عملتوا الثورة وقمنا الثورة وكله زي الفل،

[00:10:15]

**المقابل معه:**

والناس دي اتمسكت كلها رؤوس الفساد زي مابقولوا لما حبحصل جديد وفلوس اللي كانت متاخدة والبلد اللي مخنوقة دي حترجع حنعيش هل عندك أمل للكلام ده مش عارف أشك هنقولك آه طب نصبر سنة اتنين ثلاثة عشرة إيه اللي يخليني عندي ثقة أني أصبر إيه الثقة أنا عشت عمري كله كل حاجة حاضر نعم طيب أو فوت علينا بكرة مفيش حاجة بتننفذ مفيش ثقة فده برضه نقطة مش ماشيين على plan [خطة] معين فين plan [خطة] اللي ماشيين عليها.

[00:11:00]

**المقابل معه:**

قولي مثلاً say [قولي] السنة دي هنعملك كذا نمشي على الخطة مخلصش اللي احنا اتفقنا عليه يبقى معنديش ثقة في السبب ده في اللي بتقولي عليه ما هو كله بيترتب على بعضه فين بقى plan [خطة] اللي نمشي عليه فين اللي بتقولك اصبروا و. و. و. والدنيا هتبقى أحسن ومصر هتبقى أحسن مصر هتبقى أحسن أنا أتمنى ذلك بس أصبر على أي أساس هتقولك طب من ساعة 25 من شهر يناير لحد دلوقتي لسه معملتوش خطة مش مقنعة احنا عايزين نخلص في وقت العملية مش صعبة قوي برضه أنك تعمل خطة مش صعبة قوي احنا السنة دي هنصرف على التعليم مقدمناش غيرها ماشي يبقى أنا عارف إن السنة دي بس راح على التعليم، التعليم مش محتاج هو يرجع لنفسه بقى الفلوس بتاعته اللي اتصرف عليه خلاص صرفت مرة واحدة مش هصرف كل يوم، زي مابقول مسكنا الطريق ده سفلتنا سفلت خلاص.

[00:12:00]

**المقابل معه:**

وبقى جميل تاني يوم الصبح لقينا متكسر ليه نسينا نخط سلك التليفونات نقعد شهرين ثلاثة يتفتح الطريق متكسر خلاص الأسفلت باظ اتعمل الله إيه اللي كسره تاني ماسورة المية ضربت الله طب ما اتعملتش ليه صح من الأول مفيش صرف الله الله الله طب ليه ماكان من الأول كل ده فلوسنا بتضيع على هذا الأساس حاجة في حاجة في حاجة نعمل الحاجة مية ألف مرة وفلوس على الارض طب مانعملها مرة واحدة say [قل] أنت عملتها لي المرة دي بمليون ياعم خد ثلاثة مليون واعملها لي بس تعيش معاي بس خمس سنين وخذ الثلاثة مليون جنيه أنا مش زعلان ما أنت كده كده هتاخذهم مني بس بقى في صورة إيه تكسير عربيتي تعطيلي بهدلي المياه قطعت الكلام ده كله لكن أظبط الحاجة مرة واحدة وكلفها مرة واحدة وأخلص وريحيني بقى هو ده الضمير.

[00:13:00]

**المقابل معه:**

عايزين الناس دي لما تمسك المرافق بتاعتنا زي ما حضرتك بتسأليني تعم الحاجة صح الطريق الدائري عندنا زي الفل جميل جدا بتاع التجمع ده باقول لحضرتك لما المية في الشتاء تمطر صرف المية ده فين؟ فيه مفيش ليه هل معندناش حد فكر أن احنا ممكن نعمل صرف على الطريق بنسبة مليون والكلام ده كله أكيد حد فكر بس والنبي استنى أنت بس شوية خليك أنت في الخطة اللي جاية الخطة اللي جاية دي امتي بعد كام سنة بعد ما الدنيا باظت فيها فد إيه بعد ماكلفنا قد إيه وصرفنا قد إيه اتاخذ على حسابنا كل حاجة في البلد دي بتتعمل على حسابنا بتأثر علي وعليك وعلى غيري هيقولك الناس بتدفع ضرائب فين الضرائب فين الناس اللي بتدفعه ضرائب بنعملك بيه إيه اللي أنت بتعمله بيه أنت بتاخذ مني ضرائب وبتزود علي ضرائب خد مني جنيه زيادة.

[00:14:00]

**المقابل معه:**

خمسة وثمانين مليون واحد لو كل واحد دفع جنيه زيادة هيبقى عندك خمسة وثمانين مليون جنيه هيعمل بيهم حاجة إيه هما بقى مش عارفين واحنا خايفين نديك الجنيه ده متعملش بيه احنا لسة بنشحت على المستشفى 57..57 عشان داخلين بس على رمضان بسم الله ماشاء الله احنا لسه بنشحت على مستشفى زي دي بنشحت عليها وعلى الفلوس اللي راحت دي كلها طب أنتوا عابزين تقنعوني إزاي أن أنتوا بقى لكوا كام سنة بنشحتوا على المستشفى كل سنة في رمضان طب قلبهم دول كان ميت من جوه كان ميت مع احترامى لماما سوزان كانت تروح وتيجي كل واحد رايح جاي رايح جاي يزوره ويتبرع بمائة ألف جنيه ليه أن احنا نبقى في التلفزيون كده ليه ولادنا يطلعوا بالمنظر ده في التلفزيون عشان خاطر مين عشان مين يتبرع لنا ولية يتبرع لنا واحنا معانا مش معناش معانا وقادرين نصرف عليه بس توصلهم الفلوس توصلهم الفلوس مش نمد إيدينا ونطلعهم في التلفزيون كده ده أنا كاره نفسي لما أشوف المنظر ده في التلفزيون تبرعوا تبرعوا إيه ليه ليه ليه،

[00:15:15]

**المقابل معه:**

ومش عارف مين من بره بعث لنا فلوس ليه يا عم احنا مش محتاجين ده كله احنا محتاجين أن أنتوا تدعمونا ونقل على نفسنا وبعدين هبقى زي الفل واحنا اللي حاندي بقى بس اتفضلي.

**المحاورة:**

[ضحك] طيب الرد حلو ممكن نقول لنا ساعة الثورة كنت بتتابع أي قناة؟

**المقابل معه:**

بصي حضرتك أنا مكنش عندي مصداقية في أي قناة اللي ألاقيه هنا ألف الناحية الثانية ملقيش القناة المصرية شوية إيه اللي جايالي كوبري ستة أكتوبر والجزيرة مكبرة الموضوع over [زيادة] ومفيش لازم إن أنت تنزل تشوف بعينيك شفت بعينك خلاص أنا مش عايز أنزل ثاني خلاص أنا اللي علي إن أنا ارجع أقعد في بيتنا وأحمي بيتي وأحمي ولادي بس.

[00:16:06]

**المحاورة:**

طب شفت أي فرق في الإعلام المصري ساعة تنحي حسني مبارك؟

**المقابل معه:**

مش كتير يعني مش تغيير متوقع أو زي مايقولوا step by step [خطوة بخطوة] يعني مش مرة واحدة.

**المحاورة:**

طب هل أنت استعملت فيس بوك وتويتر أو أي حاجة على النت ساعة ال...؟

**المقابل معه:**

لا لا..

**المحاورة:**

خالص؟

**المقابل معه:**  
لا.

**المحاورة:**

طوب ممكن تقول لنا إزاي لما الانترنت والموبايل اتقطعوا إزاي ده أثر عليك؟

**المقابل معه:**

لا هو أثر علي كتير هو شلني يعتبر شلل شلل تام مش عارف أظمن على حد ولادي مش عارف إيه اللي تحت في ميدان التحرير اللي وصل وصلوا له فين عملوا إيه اللي تحت خرج حد من أهلى جاي مش عارف أطوله أظمن عليه هتجنن جنان مش سهل شل حياتك عزلني عن الدنيا زي مابيقولوا.

**[00:17:08]**

**المحاورة:**

طيب فيه أي إشاعات سمعتها أنت سمعتها ساعة الثورة أنت فاكرها قوي اشاعات؟

**المقابل معه:**

بصي من كترها الواحد خلاص مبقاش الواحد خلاص مركز يعني إيه..حتى لو حقيقة مفيش مصداقية الحياة كلها إشاعات مبقاش فيه مصداقية عندك في حاجة أنت خلاص أنت متأكد من دي بس وجيالك عن طريق مين ما هي الإشاعة دي بتطلع عن طريق مين من مصدر موثوق منه الله أعلم مفيش يبقى مفيش ثقة.

**المحاورة:**

طوب أنت قلت اللي أنت ناوي تروح بيتك وتحمي أولادك وكده ممكن تقول لنا شوية كمان عن الأمن بتاع البلد أخبار الأمن بتاع البلد الأيام دول وأنت إزاي دافعت عن نفسك ودافعت عن بيتك والناس حواليك دافعوا عن أنفسهم إزاي؟

**[00:18:05]**

**المقابل معه:**

بصي حضرتك هو كان فيه حاجة اسمها اللجان الشعبية عبارة عن كل واحد في البيت فيه كل شقة فيها واحد ينزل تحت في الشارع مجموعة العماير المنطقة دي تنزل تقف قدام باب بيتها مش بيتها قدام الشوارع الرئيسية تقفل المداخل والمخارج تحمي مكانك وبيتك وورديات ناس تنزل الصبح وناس تنزل الظهر وناس تنزل بالليل وحمينا مكاننا على كدة لأن كان ساعتها الشرطة مش موجودة تماما ومازالت الشرطة مش موجودة لازم تعمل كده ومازلنا بنعمل الكلام ده كله.

**المحاورة:**

طيب هل حظر التجول أثر عليك؟

**المقابل معه:**

لا.

**المحاورة:**

خالص؟



### المقابل معه:

خالص لأن مجال شغلي ماكنش محتاج إن أنا أتأخر قوي بالليل كده ولا حاجة وبعدين إيه اللي يخليني أنزل بالليل متأخر قوي حالة واحدة بس في حالة مرضية يا إما عندي شغل وشغلي كان في اللحظات ديه يبقى محدود إيه اللي يخليني أنزل أعمل إيه اللي ينزلني بقى أنزل أعمل إيه،

[00:19:15]

### المقابل معه:

يخليني أنزل أنزل ليه وأعمل إيه وأروح فين أقعد بقى أحمي نفسي وأحمي عيالي مش لازم أخط نفسي في النار أنت عندك خطر تجول طب ما أحترمه إيه المشكلة يعني عشان ما اتعودناش نمشي على نظام الساعة اتناشر منتزلش الساعة اتناشر منتزلش إيه اللي يحصل لي هي حاجة واحدة اللي تنزلي لا قدر الله لا قدر الله حالة وفاة تعبان حد يروح المستشفى هي دي اللي تنزلني شغلي فالك دلوقتي أنه ممنوع إنك تتحرك علي وعلى شغلي خلاص شغلي وقف أنت وقفتهولي خلاص أنا أحترم القانون لكن كمان بقى نازل أنا ورايح يبقى أنا كدة عايز اللي يحصلي يحصلي اتعرضت للسرقة اتعرضت للبلطجة يبقى أنا اللي أستاهل أنا قالولي كذا أنا ماشي حسب التعليمات هم أدري مش أنا بس.

[00:20:04]

### المحاوره:

طيب تعرف اي حد أو ناس كتيرة مشيوا من مصر خالص وقت الثورة؟

### المقابل معه:

فيه فيه فيه وليهم حق.

### المحاوره:

طب تعرف حد رجع لمصر عشان يشارك في المظاهرات؟

### المقابل معه:

لا هو ناس بس أعرفهم سافروا كانوا خايفين على أهاليهم والكلام ده كله فسافرولهم وبعد ما العملية ماهديت تاني أطمنوا على أهاليهم رجعوا تاني خلاص العملية مش فارقة معهم بس كانوا عايزين يطمنوا وخلاص؟

### المحاوره:

أنت تفتكر أهم لحظات في المظاهرات غير تنحي حسني مبارك طب أنا عايزة أعرف إيه حضرتك تفتكر إيه أهم لحظة بعد التنحي يعني من هو تنحي لغاية دلوقتي يعني إيه أهم الحاجات اللي حصلت؟

[00:21:05]

### المقابل معه:

ما أنا قلت لحضرتك من ساعة التنحي مفيش جديد؟

### المحاوره:

مفيش جديد؟

### المقابل معه:

مفیش جدید النهاردة فهي حاجة هنتعمل بكرة ملقتهاش اتعملت يبقى إيه الجديد إيه الخطوة اللي حصلت بعد 25 يناير وثبتنا عليها وقلنا صح مفیش حاجة متعرفیش بكرة فيه إيه النهاردة يقول لك فيه تعديل وزاري شالوا الدو وحاطه شاهين ده هل هيسمر معاي لبكرة الله أعلم هل ده كويس الله أعلم مش عارف إيه الجديد أنا عايز حد يقول لي إيه اللي تم جديد النهاردة في تعديل بكرة مفیش تعديل النهاردة الراحل ده كويس طب مفیش وقت ندي له فرصة طب مفیش فرصة ليه طب ما الناس برضه مستعجلة عايزة كله في يوم وليلة طب لأ زي ماقلت لحضرتك اعمل خطة الخطه دي هتقعد معاي كذا عشان أنفذها موافقين عليها أكمل مش موافقين عليها من الأول أنا مش داخل مش داخلها أنت بتقول لي نفذ طب دخلتني طب أنت دخلت بناء على إيه وافقت بناء على إيه.

[00:22:15]

### المقابل معه:

هو إنت داخل مسمى بقيت وزير بقيت بتاع ولا أنت داخل هتبقى وزير بناء على إيه قلت آه طب المسؤولية دي أنت قدها يا قدها يامش قدها طب أنا قلت آه قدها طب هتعمل إيه في خلال قد إيه بس عايمه في خلال قد إيه حققت منها إيه في الفترة دي لا قيناك اشتغلت حققت ده بكرة ده بعده نبقى نديك فرصتك دا بكرة دا بعده لكن مفیش حاجة بتتعمل فا دي جايمه من كده يقول لك طب ما أنتوا مش مديينوا وقت عشان ما اداش ال plan [خطة] بتاعه صح وضح لي عشان أسيبك لكن أنت بتخش آه طيب لا هو التعديل اللي حصل في الشرطة ده إزاي يعني تقول لي أشيل خمسمائة وخمسين لواء يعني الخمسمائة وخمسين لواء دول مكنش ليهم لازمة ما حد يقنعني إنك تشيل مرة واحدة خمس مائة وخمسين لواء سهلة.

[00:23:15]

### المقابل معه:

مش سهلة أنا اللي أعرفه دي مش سهلة يعني مكنش لهم لازمة الخمسمائة وخمسين يعني كل دول كانوا بيخدوا فلوس على الفاضي كل دول كانوا بيعملوا إيه لما هم الخمسمائة وخمسين شلتهم مرة واحدة دفعة واحدة هو دا صح دا مش صح بس.

### المحاوره:

طيب شوية أسئلة عن الجامعة والثورة تفتكر إن الثورة أثرت على الجامعة بأي طريقة؟

### المقابل معه:

أكيد أكيد

### المحاوره:

إزاي؟

### المقابل معه:

بصي حضرتك الجامعة كانت في أوقات فيها ابتدت تراجع نفسها زي مايقولوا كمرتبات كان عندها زي ما تقولي إيه أولويات في الأول ابتدت بقي تغيير الأولويات بتاعتها يعني كنا احنا إيه زي مايقولوا الشغل أهم حاجة ونعلى بالمكان منشأة جديدة كنا عايزين نعلي بيها بأسرع ما يمكن فابتدت تنسى الموظفين شوية ينسوه شوية....

[00:24:15]

**المقابل معه:**

يعني إيه الميزانية مضغوطة عايزين نرفع المستوى شوية عشان المكان لسة جديد لكن جات بعد الثورة قالك لا بقى طب نبتدي نهدي الموضوع ده ونبتدي نعمل تعديلات في الجامعة نفسها وابتدت ماشية برضه step by step [خطوة بخطوة].

**المحاورة:**

طيب هل الثورة أثرت على التلاميذ في الجامعة يعني تفكيرهم شفت دلوقتي بيشاركوا أكثر في السياسة؟

**المقابل معه:**

بصي حضرتك هي اختلفت عند غير المصريين بنظرة ليهم للمصريين فهمتيني يعني كنظرة للمصريين اختلفت.

[00:25:10]

**المحاورة:**

طيب تفتكر إيه عيب التغيير في مصر عن قريب وعن طويل؟

**المقابل معه:**

مش فاهم قصدك؟

**المحاورة:**

يعني تفتكر هيبقى فيه تغيير في مصر بعد الثورة ؟

**المقابل معه:**

مش فاهم قصدك؟

**المحاورة:**

آه يعني التغيير إيه حاجة هتتغير؟

**المقابل معه:**

فيه حاجة هتتغير في المستقبل في مصر طبعا.

**المحاورة:**

آه

**المقابل معه:**

أكيد ده شيء أكيد.

**المحاورة:**

فيه أي حاجة متوقعها بالذات؟

**المقابل معه:**

آه إن مصر تقوم ثاني مصر تقوم ثاني

### المحاورة:

طبيب أمنيّك اتغيرت إزاي قبل الثورة وبعد الثورة ؟

### المقابل معه:

أمنيّتي قبل الثورة دي متسألنيش عليها لأن أنا مكنش عندي أمنية أن أنا أفكر أحققها عشان عارف مش هعرف أحققها لكن بعد الثورة عندي أمل كبير إن يكون حد عنده ضمير بس ويسمعني ويحقق وياخد مني وأخذ منه بس. لكن قبل الثورة خلاص بقى مكنتش متوقع حاجة تتغير.

[00:26:10]

### المحاورة:

طبيب في حاجة تانية عايز تقولها عن الثورة كلها؟

### المقابل معه:

عايز أقول ربنا يهدي ويارب يكون خير بس والناس بقى ترجع تاني بجد وتسيبها من ميدان التحرير تسيبه منظره باظ مش منظر ميدان التحرير كان شكله جميل في الأول دلوقتي باظ رحنا دهناه وكنسوا ونضفوا وقتها رجعوا تاني لنظافته كل واحد يرجع يروح لبيته أحسن بيته أولى بيه أي ست أي راجل بيته أولى بيه مش وقفته في الشارع هي اللي هتنتجحه سيبوا الناس تشتغل كل واحد يدعي ربنا ويعمل اللي عليه ويسيبه على ربنا مش كل واحد يتدخل اللي ملوش فيه مش كل واحد تطلع له فكرة في دماغه تروح مع نفسك وتنزل ما تدوش فرصة لحد يدمرنا.

### المحاورة:

طبيب شكرا.

[00:27:16]

[نهاية المقابلة الشخصية]